



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 3

**Thai PM-i prangbong alitsü
atema permit magütsütsü tuyu**

**Tir Murmu-i Vande
Mataram Bill agizükogo**

VOL. XXIII ISSUE NO. 300 (ADOK 300) DIMAPUR RASEMNÜ (WEDNESDAY) LUROI (AUGUST) 12, 2026

₹ 5.00

BJP Nagaland-i Jharkhand sorkar aitsür

Dimapur, August 11, 2026 (TYO): Jharkhand nung Congress-JMM-i aniba sorkari tai maketba kaketshirtem dak tashiyim mapa inyakba aitsür ta Bharatiya Janata Party (BJP) Nagaland-i metetdaksüogo.

Kaketshirtemi parnok temeten aser mapa inyaksü atema timi lungkak aitdang Jharkhand sorkari tashiyim mapa tulu inyakogo ta parnoki ashi.

"Linük ajungai Jharkhand nung kaketshirtem dak tenük yokdar. Parnoki tebilemtsütem atema noktakba dang masü saka timi, akhümketa aser tashi angaa lungkak aiter" ta BJP Nagaland, state vice president Basu Damani-i ashi.

Congress party aser JMM sorkari kaketshirtemi ahangba ama inyaksüla. Linük ajunga nung democratic aser meimchir tangatetba anema parnoki inyakogo aser maaksü bentsür aruogo ta BJP Nagaland-i metetdaksü.

Jharkhand nung kaketshirtem dak tashiyim inyakba aitsür aser

Rahul Gandhi o Congress party-i anemsü mapa inyakba atema linük nung lanurtem dang tatok meshitsüla ta parnokisa takhangba agütsü.

Rahul Gandhi-i tuyuba ama lanurtemi Ranchi, Jharkhand nung job scams aser paper leaks anema timi lungkak ait, saka parnok reshikangshi. Rahul Gandhi-i Delhi nung Jantar Mantar nung politics asaya saka Jharkhand nungbo kaketshir ola mangashir ta BJP Nagaland-isa metetdaksü.

Rahul Gandhi-i tiyazü maneni jembiba, terata adokdaksüba aser Parliament meinprongba linüki repringdar. Pa indang nükjidong ya olemtep mesüra telatet ka angutsü atema masü saka petsaprong adokdaksütsü lir. Iba jagi pai anogoshia o melenshir ta BJP Nagaland-isa ashi.

Congress-i tejak ana tener politics inyakba lanurtemi nguogo aser tiyazü nung amendakba politics ya kobi melii laotsü ta parnokisa ashi.

Nagaland nung IEC Campaign 3.0 tenzüksü



Dimapur, August 11, 2026 (TYO): National AIDS Control Organisation (NACO) kübok Nagaland State AIDS Control Society (NSACS)-i August 12, 2026 nü Intensified Information, Education and Communication (IEC) Campaign on HIV and STIs tasembuba round tenzüksü.

Agri Expo, 4th Mile, Chumoukedima nung International Youth Day den külemi sentong ka nung Health & Family Welfare Minister P. Paiwang Konyak-i iba campaign tenzüksütsü.

Ita ana campaign nung HIV & STI awareness, promoting & and early testing, addressing stigma & discrimination, aser related health services tuluba akümtsü nung temulung agütsütsü.

Iba campaign mapang NSACS-i yimtsüng 287 nung village-level meetings 550 agitsü, household door-to-door

outreach activities 5,500 aser school outreach sessions 540 agitsü alizüng lir.

Campaign nungsa yimtsüngtem nung 110 folk performances, college awareness sessions 64, urban flash mob activities 50 aser Government hospitals nung special health camps 17 agitsü.

NSACS-isa digital outreach tashi aitsü atema social media influencers 40 tashi anioka sentong balala agitsü.

Iba campaign ajanga HIV Self-Risk Assessment Tool and BreakFree ajungkettsü aser lanurtem nem accessible information aser avenues agüja HIV o STI services den sendakteptsü.

NSACS-isa Niuland, Tseminyu, Tuensang, Mokochung - Longchem aser Mon - Tobu nung Health on Bike outreach motorbikes pungu sayatsü.

Item bike pungu ya district 8 nem agüja aliba Health on Bike motorbikes den bendenloksü aser metongteti aliba nübortem tonga oa outreach mapa inyaksü.

Minister Paiwang-isa Intensified IEC Campaign 2026 Bike Rally tenzüksütsü aser iba nung bikers 25-i HIV and STI awareness osang prokshitsü.

Governor Yadav-i Excise & Prohibition Department den senden amen



Dimapur, August 11, 2026 (TYO): Nagaland Governor Nand Kishore Yadav-i August 11, 2026 nü Department of Excise & Prohibition den senden ka menogo.

Lok Bhavan, Kohima nung amenba senden nung department-i Nagaland Excise Act, 1967, Nagaland Excise Rules, 1972, Nagaland Liquor Total Prohibition Act, 1989, Nagaland Liquor Total Prohibition Rules, 1990, Narcotic Drugs and Psychotropic Substances (NDPS) Act, 1985, aser Drugs & Cosmetics Act, 1940 kübok inyaksangshi indang lemsatp.

April 2021 nungi March 2026 tashi enforcement activities inyaka arudang department-i Nagaland Liquor Total Prohibition (NLTP) Act aser drug dak sendakba ken o tem benoka liasü.

MP Supongmeren-i FCRA Amendment Bill, 2026 thinentsü mepir

Dimapur, August 11, 2026 (TYO): Lok Sabha MP S. Supongmeren Jamir-i Union Home Minister Shri Amit Shah dang Foreign Contribution (Regulation) Amendment Bill, 2026 thinena atatsü mepishiogo.

Sendaktepa alirtem aser political party ajak den asügangya masü tashi iba bill sota atatsüla ta pai ashi.

Iba bill yanglushiba ajanga India nung secular aser diverse social fabric nung kongshitsü, aser ibaji talisa education, healthcare, orphanage care, charitable activities aser humanitarian services inyakba rejutem lir ta MP Supongmeren-i shidi ka nung shiogo.

Bendanger senotsü agütsüba ya kanga nüngdaker saka iba ajanga national security, sovereignty mesüra public order nung mekongshitsüsa inyaksüla ta paisa ashi.

Linük nung FCRA registrations 22,498 tashi cancel süogo aser 15,212

Iba mapang IMFL, country liquor, poppy straw, opium, heroin, cough syrup aser capsules/tablets ama tanga drugs aika apu.

Department-i April 2021 nungi March 2026 tsüngda Rs 2,250.66 lakh (Rs 22.51 crore) revenue bendenteta liasü. 2021-22 nung Rs 317.36 lakh nungi 2025-26 nung Rs 591.96 lakh bendena annual collection teimba aküm.

Iba senden nungsa Phek o Peren nung Excise Offices aser Dimapur nung Excise Bonded Warehouse yangluba dena Excise Housing Programme for 2025-26 kübok infrastructure development meyipa repringshia liasü.

Department-i tayongzüka tulu ajurubatem rongnung artsü ajanga zübazüba senzüba, nübo peria maliba, department

tenzüka nungi cadre review maliba, inter-district check-gates shibangba, prangpong tejen, operational mobility sadema mesütetba aser illicit liquor kanga bulua ajemba indang lemsatp.

Department-i tarutsü anogotem enforcement akangshitsü, organised crime anema raratsü, public health kümzüka ayutsü, governance tajungba akümtsü, revenue teimba akümtsü, personnel atema capacity building agitsü aser drug-free Nagaland asoshi inyaka aotsü lemsatp.

Governor Yadav-i enforcement mechanisms aser institutional capacity tashi aittsü indang nenshia jembi.

Iba senden nung Secretary, Excise and Prohibition, T. Wati Aier aser tanga ketdangsürtem aden.

ajurutsü, talisa educational, healthcare, charitable mesüra tanga public-service infrastructure atema foreign contributions amshiba teloktemi tetsükdaksü angutsü ta Supongmeren-isa shisem.

FCRA Bill, 2026 ya Constitution of India nung Article 300A dena constitutional protections tangatetba kübok jungjunga asadangsü nüngdaker ta Supongmeren-isa ashi.

"Sendaktepa alirtem aser political party ajak nem pei pei tangatetba lemsatpba maongka magütsü tashi FCRA Bill, 2026 ya mebenoki atatsüla" ta MP Supongmeren Jamir-isa mepishiogo.

Education, healthcare, orphanage care, charity aser humanitarian services inyakba teloktemi linük yangerba wadang nung tongtipang shilem agir anungji ozüngi melaba rejutem regulatory measures ajanga timtem magütsütsüla ta paisa ashi.



Latitude: 26.488823
Longitude: 94.659275
Elevation: 1105.85±4.35 m
Accuracy: 5.247 m
Time: 11-08-2026 13:58

Note: joint inspection with Road coordination committee under bypass

Tawa July 19 nü tzunglu kanga aruba mapang Chuchuyimlang aser Unger na tsungda NH 2 lenmang tesem ka anenzuka aluba agi tang tashi iba National Highway ajangabo gari mesenzüteter, anungji ibaji mekendoka Unger lushi nungsa lenjen ka bypass asütsü department-i yanglushidagi. Iba bypass lenmangji akok tashi tekaratiba nung yanglushir nübortem jasadaktsütsü asoshi department nung ketdangsertem den senden ka, Unger yimtak LTM Tadong tir Wb.Limasangwaer kidang Langpangkong Tzükong Mungdangi shimtetba LTM Road Co-Ordination Committee aser LKM Road Coordination Committee nung lenirtem dena amendang agiba noksa ka yangi angur. Iba senden nung August 12, 2026 nungibo iba bypass lenmang nung nübortem timmedemi jajatsüsa department nung ketdangsertemi nungdakba machinery-tem amshia anepalutsü tetuyuba agütsüogo. (Unger, August 11,2026.)

Fire&Emergency Services-i reju balala nem awareness agütsütsü

Dimapur, Luroi/August 11 (TYO): Directorate of Fire and Emergency Services, Government of Nagaland ajanga banking institutions, educational institutes, business associations aser high-rise mesüra shopping complex kiburtem dang department indang fire safety awareness campaign agitsü sangdongogo, kong mock drills aser evacuation exercises tema dena alitsü.

Fire Department aser nüburtem tsungta tesendaktep tajungba nung mapa inyakba tashi itshitsü aser kasa mapang commercial aser institutional spaces nung alir nem

awareness tajungba nung agüja renemshia alitsü nükjidong nung iba mera ya agir, ta Department-i sangdong ka nung ashi.

Iba training nungya mi remsepba osettsüset balala amshiba yimya tem, kitsük-kirong lendong nungi kumzüka alitsü lenmang tem, fire extinguishers amshiba yimyatem, LPG safety measures, mock and evacuation drills, inoka aliba firefighting systems amshiba yimya aser basic first aid amala sayutsü.

Iba campaign atema department-i ita shia anogo-mapang lemsaa lir. Public aser private sector banks tem September 2026 nung

awajemtsü, iba sülen schools aser colleges (government aser private) tem October ita awajemtsü.

Market areas tem November ita awajemtsü aser shopping complexes aser malls tem December 2026 mapang awajemtsü.

Anungji iba sentong agitsü tejangraba aliba lokti tentet aser reju temi August 31, 2026 tashinung anasatiba fire station nem temebishiba agütsütsü metetdaksür. Mapang kasa nung applicants ana mesüra tali arura, department-i tesem shima training agütsütsü, ta Fire Department ajangasa metetdaksü.

DDMA Dimapur-i nüburtem dang tekum dangtsü metetdaksür

Dimapur, Luroi/August 11 (TYO): Tzunglu tanen makai aruba ajanga telemok tesemtem nung tzü atsüngdentsü aser tzümetsüng adoktsüsa aliba mechi District Disaster Management Authority (DDMA), Dimapur ajanga nüburtem dang saksalema alitsü aser nungdakba mera agitsü metetdaksüogo.

Deputy Commissioner & Chairman, DDMA Dimapur, Dr. Tinojongshi Chang, NCS ajanga tekum dangtsü metetdaksüba nung nüburtem dang pei anasa kilentsü aoba tesem aser tzü alidak akhi mapang ama mesüi tzü tulu akumba kanga junga mita alitsü ashi.

Pai nüburtem dang tzunglu kanga sashia aruba mapang, talisa tzü atsünga aliba aser tzümetsüng adoktsüsa aliba tesemtem nung tongtipang nungdak mesüra mesenzütsü ayongzüka liasü. DDMA ajangasa nüburtem dang tzümetsünga aliba lenmang

tem, kilentzü aoba lenmang nung tzü tali yima aliba mesüra tzü kanga kera yima aliba tetsüng mesüragari nung ajanga aotsü memerangtsü ashi.

Tsürabortem dang pei tanurtem ayong, kilentzü aoba lenmangtem, culverts aser tzü metsünga alidaki meyoktsü ashi. Gari nung senzürtema amman nung aser tzunglu kanga sashia aruba mapang kanga kumdanga senzütsü metetdakja liasü.

Nüburtem dang tzunglu sashia aruba aser tzümetsünga mapang electric poles, tsüka aliba electrical lines, ki o jen tashi mait, raksar aliba ki aser süngdong laoa aliba anasai maotsü ashi.

Telemok aser mela-mela tzümetsüng adoktsüla tesemtem nung aliba nüburtem dang tensa apir tesem balalai aotsü renema alitsü ashi aser nungdakba osettsüset, mozü, tongtipang documents, tajemtsü tzü, mobile phones aser communication devices aser

torches tem renema yua alitsü ashi.

DDMA-i nüburtem dang kilentzü aoba lenmang aser nallah amala nung jana mesüra osettsüset kecha mindoktsü ayongzüker aser item amala osettsüset indokba ajanga tzü sadema moteti tzümetsüng adoker aser tzü atsüngtener, ta ashi.

Nüburtem dang Nagaland State Disaster Management Authority (NSDMA) aser Home Department ajanga tzungsang-mopung takzüba aser advisories agütsüba sülen anidaksü aser osang mejangja meporoktsü mesüra osang tejangja masüba nung ajemdaker mera magitsü shia liasü.

Ajungben timtem mapang nüburtemi SDRF den 9856302919 mesüra DDMA Dimapur den 8131924008 ajanga tongteprateptsüla mesüra local administration anasatiba police station/outpost den tongteprateptsü metetdaksü.

Nagaland nung PMAY-Urban houses 30,000 dak tema renemogo

Kohima, Luroi/August 11 (TYO): Linük nung Pradhan Mantri Awas Yojana-Urban (PMAY-U) mapa kuma inyakba nung Nagaland ya tajungtiba inyaktetba states tem rongnung densema ki 30,000 dak tema renemer nüburtem nem agütsüogo.

Ministry of Housing and Urban Affairs ajanga ashiba agi, Nagaland nung PMAY-U kübok ki 31,860 sanction asü, aser iba atema centre-i sen 503.91 crore sanction asü. Item nungi ki 30,202 renemogo, anungji 'highest completion rates' rongnung Nagaland adener.

Iba osang ya Housing and Urban Affairs Secretary Satendra Singh-i anir Central Sanctioning and Monitoring Committee senden amendang agüja liasü.

Committee-i staes aser Union Territories 16 nung Economically Weaker Section (EWS) kibongtem asoshi PMAY-U 2.0 kübok ano ki 2.09 lakh sanction süogo.

Nagaland nung iba ki renemba ya shilem 96 lir, ta State Mission Director, PMAY-U Temjenrenla Kechu ajanga taoba mapang lemsatepba nung shia liasü.

PMAY-U 2.0 kübok senotsü teyari timba kumja beneficiary shia sen 2.5 lakh agütsür. Nagaland nung Angikaar campaign ya inyaka temsüa aliba kibongtem ki yangluba nung yaritsü asoshi awareness programmes aser loan melas tem ayongzüka liasü.

Ki asüba nung yariba ya yimdak yimtsüngtem nunga lir. PMAY-Gramin kübok Nagaland atema ki 48,826 sanction asü aser 19,300 renemogo.

Iba teyari agirtemi pei aliba tesem nung anguba oset, talisa süngkum aser long amshia ki yanglur ta ketdangsür temi ashi.

PMAY-U 2.0 kübok 2028 tashinung temsüa aliba urban beneficiaries ajunga nem pucca ki nung nungdakba amenities dener agütsütsü Centre nükjidong lir.

Media dang tanur dak sendakba osang kumdanga abentsü ayongzüker

Dimapur, Luroi/August 11 (TYO): Media houses aser YouTubers tem den state-level consultation senden ka "Strengthening Child Protection through Ethical and Responsible Reporting" onük nung ajemdaker Hotel Saramati, Dimapur nung August 11, 2026 nü ayongzüka liasü.

Iba senden ya Prodigals' Home, Dimapur ajanga DKA Austria teyari nung ayongzüka tanurtem temeden wazüka ayuba aser tanurtem dena aliba ken o indang osang kumdanga abentsü aser tashi itshitsü nükjidong nung ayongzüka liasü.

"Field Experience, Challenges and Looking Ahead" indang session nung osangbener Sub-Editor, Eastern Mirror, Prasanjit Dutta aser Musaraf Ali, Senior Reporter, Nagaland TV nungeri tanur densema osangtem kanga kumdanga abentsü nungdakba indang jembi aser osangbener temi tanurtem dak sendakba osang abendang tetsükdaksü ajuruba aser ajangshiba tem lemsatepa liasü.

Dr. Moalemba Jamir, Associate Editor, Morung Express ajanga "Protecting Child Rights & Identity: From Law to Newsroom Practice" onük nung ajemdaker jembidang, social media aser tesendaktep tajung aliba nüburtemi osangtsüsang kanga kera prokshiba mapang tanur maitsü wazüka ayutsü merangba nung osangbener temi tetsükdaksü ajuruba tem lemsatepa liasü.

Tanur dak timtem atalokba nung nüburtemi temeim sayur,

lokti tentet balalai ochi obendang akhanger, saka iba ama telangzüba agütsüdang memeteti tanur indang maitsü temai adoktsür alir, ta pai ashi.

Tanur maitsü poktia mesüaka school, tanur aliba tesem indang tenüng tem, kibong indang osang, noksa tem aser uniforms amala temai adokba ajanga tanur jangjadaksür. Tanur tenüng küsüng miimbanga ayubaji teperi masü, anungji traditional aser digital media sapang temi kanga kumdanga osang abentsüla, ta pai ashi.

Protection of Children from Sexual Offences (POCSO) Act, 2012, aser Juvenile Justice (Care and Protection of Children) Act, 2015 nung tanur maitsü wazüka ayutsü jangja-jangja shia lir, ta Dr. Moalemba-i ashi.

Tsürabor mesüra lokti ajanga melabaji teperi masü, tanur mesüra kinungeri yimjak nung jembitsü mulunga liaka, osangbener temi kanga kumdanga tarutsü tia asadanga osang abentsüla aser prokshitsüla ta pai ashi.

"Tatalokba osang mezüng sangdongbaji tongtipang masü. Tejangja aser yimya shidak amshia osang abenbaji tongtipangba lir," ta Dr. Jamir-isa ashi.

Iba senden nung media practitioners aser shilem agirtemi tanur adenba osangtem abendang timtem ajuruba aser tim yimya amshitsü indang sensaksema liasü.

Sentong tembanga Director, Prodigals' Home, K. Ela-i melepzüng o jembi.

2026 Kanwar fair nung Kanwariya million 48-i Haridwar semdang

New Delhi, Luroi/August 11 (Agencies): Anogo 14 Shravan Kanwar pilgrimage amungba mapang Kanwariya million 48-i Haridwar semdangogo, koba otsü tasen ka lir. Iba sentong ya July 30 nü tenzük aser Mongolbarnü tembangogo, koba yimti nung Kanwar fair tulutiba liasü, ta ketdangsürtemi Mongolbarnü ashi.

"Otsüsütsüsa linük kübok tesem balala nungi Kanwariya crore 4.8 Haridwar-i aru. Mongolbarnü teroru tashi nung Kanwariya tem maneni aruogo, anungji nikongtsütsü tashi nung nisung timba akümtsü imlar," ta

senior superintendent of police Navneet Singh Bhullar-i ashi. Kanwar Mela Cell-i bendenba data ajanga 2025 küm tekülemer million 45.2, 2024 küm million 41.4 aser 2023 küm million 40.1-i iba sentong nung shilem agiba sayuogo.

Tatembangbuba anogo ana nung nüburtem aikati iba tesem semdangba ajanga taoba kümtem dang nungi taküm nisung timbai iba tesem semdangogo. Hombarnü kija tekülemer million 6.36-i Haridwar semdanga temeshi ganga tzü bener ogo, koba Sawan Shivratri nung Shiva

lingams nem agütsütsü.

Nisung aika aruba ajanga district administration aser security agency tem atema tetsükdaktsü aika ajangshiogo. Parnoki anogoshia Haridwar aser temeket tesemtem nung nisung million aika achaayanga liasü.

Bhullar-i ashiba agi, Uttarakhand police personnel 6000 dak tema den Central Armed Police Forces (CAPF), Provincial Armed Constabulary, Indian Reserve Battalion aser Anti-Terrorist Squad nungi sepaitemi iba sentong kanga junga aziökogo.

Ranchi nung ABVP workers 110 sota yuogo

New Delhi, Luroi/August 11 (Agencies): Hombarnü Ranchi nung longkak aita aliba kaketshirtem Vidhan Sabha leni oya aliba mapang police temi lathi agi züka minshiba sülen Mongolbarnüa asendenshir longkak aitba mapang Akhil Bharatiya Vidyarthi Parishad (ABVP) züngsetem aser police tsüngda mangatettep adoka liasü.

Jharkhand Assembly leni longkak aita oya aliba mapang ABVP züngsem 110 puogo, ta police-i ashi. Mepetmesü adoker aliba mapang activist tem police gari-i soketa atuba nguogo.

ABVP ya right wing Rashtriya Swayamsevak Sangh (RSS) nung züngoksema aliba telok ka lir aser parnoki Jharkhand assembly longbangtsü meranga liasü. Kasa mapang nung August 10 nü police-i tashiyim amshiba atema BJP-i state ajunga mokdangtsü ayongzükogo.

Hombarnü JPSC-JSSC State ajunga mokdanga ayutsü ayongzükba atema Jharkhand minister Irfan Ansari-i BJP aitsüogo aser ashiba agi, iba party yagi kaketshirtemi yimjung nung longkak aita aliba tamajungba kümdaktsütsü meranger. Ansari-isa, Hemant Soren-i aniba sorkari yimjung nung longkak aitertem pusemer, saka BJP-i iba movment raksatsütsü atema lendong bener arutsürtem yoker, ta ashi.

Jharkhand Public Service Commission (JPSC) aser Jharkhand Staff Selection Commission (JSSC) nati ayongzüka agiba recruitment tatidangtem nung inyakyim meshidak aliba atema kaketshirtemi longkak aita arudar.

Longkak aitertemi JSSC-Combined Graduate Level (CGL) tatidang thitsütsü, inyakyim meshidakba atema Central Bureau of Investigation (CBI) nem bushisüngdang südaktsütsü aser recruitment inyakyim meleshitsü atema khanga arudar.

JMM MP Mahua Maji-i ashiba agi, sorkar aser kaketshir lenirtem senden menogo aser parnok takhangba 98% bo agizükogo aser 2% dang magizüki lir.

Jharkhand minister yagisa, sorkar anema parnok tejangraba ataloktsü atema tanurtem jong ama amshiba atema BJP aitsüogo.

JMM MP Mahua Maji-i ashiba agi, sorkar aser kaketshir lenirtem senden menogo aser parnok takhangba 98% bo agizükogo aser 2% dang magizüki lir.

Maji-isa, sorkari parnok takhangba kar mataloktsütet kechiyong item ya state sorkar tazüokba kübok mali, ta ashi.

Arunachal ya India nung shilem ka: MEA

New Delhi, Luroi/August 11 (Agencies): India-i Arunachal Pradesh nung tesem aser features 27 parnok indang nüngja agi agizüksü atema jenjang agiba China-i magizükba sülen Ministry of External Affairs (MEA)-i Mongolbarnü sangdong ka ajanga, Arunachal Pradesh ya India nung shilem ka aser pilatsü makok ta shiogo.

"Arunachal ya India nung shilem ka aser pilatsü makok, koba ochi lir. Kasa mapang nung kechaia iba ya melenshitsütsü makoktsü ta ni jangjashitsüner," ta MEA otongdar Randhir Jaiswal-i osangbenertem den sensaksemba mapang ashi.

India sorkari iba northeastern state nung tesem aser features 27 official Indian map nung parnok indang nüngja ama enoktsü atema jenjang agiba China-i aitsüba sülen otongdar yagi iba olen lemsatapa liasü.

Hokolbarnü India-i Arunachal Pradesh kübok Line of Actual Control (LAC) nung tesem aser geographical features 27 indang nüngja sangdongogo. Ketdangsürtemi

ashiba agi, China-i kümtem tsüngda Arunachal nung tesem kar nüngja melentsütsü merangba atema telangzüba agüja iba jenjang agiogo. Tang mezüngbuba India-i cartographic map ka nung item tenüngtem enoktsüogo.

Tesemtem rongnung arrtsü nung aliba Longju yimtsüng densema lir, koba China-i 1959 küm nungi atsünger lir, saka India-i mekazüka aliba alinük küboki aiter, ta parnoki shisem. Item tesemtem ya temzüng ozüng kübok India nung shilem ka ta jangja jangja metetdaktsütsü atema iba jenjang agiogo.

Iba ken o jangja aliba ketdangsür kati ashiba agi, "map dak sendakba nung ken o ya lenla aika nungi angatettsü akok. China-i iba ya amshia Arunachal Pradesh kübok tesemtem nüngja balala agüja arudar, koba India nung shilem ka lir.

"Survey of India map nung item tesem 27 züngoksemba ajanga ken o jangja kümdaktsür aser geographical features tem official documentation akangshitsü," ta paisa shisem.

Tir Murmu-i Vande Mataram Bill agizükogo



New Delhi, Luroi/August 11 (Agencies): Tir Droupadi Murmu-i Mongolbarnü Vande Mataram Bill agizüksü atema temelaba agütsüogo aser iba ajanga linük ken (National Song) nema temzüng ozüng kübok linük naklo ken den kasa teküzmükba agütsüogo.

Parliament-i, taoba ita Prevention of Insults to National Honour (Amendment) Bill, 2026 agizükogo aser iba ajanga Prevention of Insults to National Honour Act, 1971 yanglushiogo. Iba ozüng ajanga Vande Mataram nem Jana Gana Mana ama kasa teküzmükba agütsütsü meranger.

Tir-i agizükba sülen iba bill ya ozüng kümogo, anungji aibelenertem küm asem tepuokdak ayutsü, senchi achitsü mesüra temerenshi anaprongla külemi agütsütsü akok.

Taoba mapang Prevention of Insults to National Honour Act ajanga linük naklo ken (Jana Gana Mana) asa-a metendaktsüba mesüra iba ken atenba mapang minprong masütsü tenokdangba agütsür liasü.

Ajisüaka iba ozüngyagi linük ken nem kasa teküzmükba magütsüi liasü.

Constituent Assembly tir Dr Rajendra Prasad-i 1950 küm

January 24 nü Bankim Chandra Chatterjee-i mejemba 'Vande Mataram' ken ya linük naklo ken 'Jana Gana Mana' ama kasa tushia amshitsü aser ken anaprongla kasa jenjang nung toksütsü ta shiogo, ta Bill nung shia lir.

Union home ministry-i Hombarnü sangdong ka ajanga tang mezüngbuba Independence Day sentong nung Vande Mataram ya Red Fort nung atentsü ta metetdaktsüogo.

Taküm küm tetenzüklen Union Home Ministry-i, linük ken aser linük naklo ken naprongla atenba mapang 'Vande Mataram' tekong trokprongla ya mezüng atentsü ta shiogo.

Ministry-isa, tir aruba mapang, linük wako salaba mapang aser Angtemi o jembiba mapang amala official sentongtem nung linük ken teko trokprongla atentsü tetuyuba agütsüogo.

"Linük ken aser linük naklo ken naprongla külemi atenba mesüra atemba mapang linük ken ya tama atentsü mesüra atemtsü," ta tetuyuba nung shia lir.

Tetuyuba nungsa school ajak nung linük ken ya tenerang anogo tenzüksü ta shia lir.

AXIS BANK

Axis Bank Limited

AC Market Building , 4th Floor , 1, Shakespeare Sarani , Kolkata – 700 071 ;

Public Notice for. Auction Of Pledged assets being Gold Ornaments

NÜBURTEM DANG METETDAKTSÜR

Nüburtem dang aser talisa sen apurtem dang Axis Bank nung tsünglanglen shia aliba Branch nung tsünglanglen agüja aliba accounts nung gold ornaments pledge public auction asütsü metetdaktsür. Tsünglanglen shia aliba sen apuri Axis Bank Limited nungi security ama gold ornaments ("Gold Loan Facility") yutsür credit facility agia liasü. Sen apur/kuli sütsür dang Gold loan facility agia aliba nung parnoki temonoktsü aliba menokang ta sangdong agütsü. Ajisüaka sen apur/kuli sütsüri apua aliba sen memonoktet nung bank-i züngzüktepa aliba ama inyaktsüsa akumer aser schedule of property nung shia aliba gold ornaments tem **11-09-2026** anogo anepdang **11:00 ako** (e-auction mapang) nung "As Is Where Is", "As Is What Is", "Whatever There Is" aser "No Recourse Basis" ama e-auction asütsü lir. **Sen apur aser temenoktsü sen tejangja.**

Customer Name	Loan A/c No.	Amount Outstanding	Date of Demand Notice	Gross weight grams.	Net weight grams.
BRANCH_RAC_NAME- LHOMITHI BAZAR NL					
JALILUR RAJA KHAN	XXXXXXXXXXXX9540	706980.00	13/Jul/26	111.800	107.300
MARAN BISWAS	XXXXXXXXXXXX0058	228625.00	20/Jul/26	22.400	21.700
NAVNEET SINGH	XXXXXXXXXXXX1939	519699.00	13/Jul/26	61.800	51.100

TENDER INDANG TERMS & CONDITIONS

Base/Reserve jenjang ya auction anogo tenderers tem nem agütsütsü aser iba dak ajemdaker auction bid asütsü. bank-i agüja aliba prescribed tender form bid/offers dak dang ajemdaker bidding asütsü. Bid form/tender mabensai lira invalid ama züngshitsü aser magizüksü. Tender kuli kaket den terms & conditions tem temalen shisema aliba branch tem nungi agizüktettsü. Tender kuli kaket tabensa ya ken o dak sendaka aliba branch ketdangsürtem nem **11-09-2026** nü mapa inyakba mapang agütsütsü. Atakzükja aliba anogo süitemba sülen agizükba tender tem masadangtsü. Shisema aliba oset ya "As Is Where Is", "As Is What Is", "Whatever There Is" And "No Recourse" Basis nung ayoktsü atema lapoktsür. Bank-i oset dak sendakba nung standard, purity mesüra tanga sentsüh, saru amala indang kecha khuret magütsü. Tender tem ya Bank-i auction asüba anogo tenderers tem matsüngdang lapoktsü, shirnoki iba anogo aser mapang shitak nung aru shilem agitettsü

Branch tenüng temalen shisema lir. Auction anogo: 11-09-2026

Offer/tender khien benokba sülen tanaben meyipa magitettsü aser bidder temi article/asset/ornament ka atema single bid/offer lira bid jenjang enoktsütsüla.

Article/asset/ornament ka atema bid asür ka dak tali lira bidder tem yongtsü nung inter-se bidding akatsü aser shibai timba bid südir pa nem agütsütsü.

Bidder temi KYC documents i.e. PAN Number, PAN Card, Adhar Card & Address proof amala agütsütsüla. Bidder temi valid E-mail ID & Contact Number agütsütsüla.

Offer agizüksü magizüksüji Bank dak keta lir.

Oset/ ayoktsü atema tokja alibatem dak sendakba nung mangatettep kar danga lira Mumbai nung Courts/Tribunals temi dang achaayangtsü.

Date: 11.08.2026

Place: Kolkata

Authorized Officer,

Axis Bank LTD



TIR YIMYIM YIMOBILEM (EDITORIAL)

DIMAPUR WEDNESDAY, AUGUST (LUROI) 12, 2026

Asenok nükjidong melendi !

Yakanü Nagaland Public Service Commission (NPSC)-i Extra Assistant Commisioner 6 aser Deputy Superintendent 3 den ano tanga department-tem nung government mapa tapu balala asoshi tatidang agiba nung takok angurtem osang agütsüogo aser EAC aser DSP mapa angurtem rongnungji Aotsür-Aor kata mali asü. Atangji, aji tesüngmangtsüka aser tebilemdangtsü tulu, iba jagi asenok aikati iba osangji ngur aoksar, sasar aser nümamedangteter. Atangji, EAC aser DSP mapa angurtem rongnungji meliaka, tanga mapa tajung BDO aser tanga mapatem nungbo Aotsür Aor lanurtem karibo takok nguogo. Ajisüka, nisunger yimya asünungji asenoki state government mapa nung jenjang tuluba NCS aser NPS mapa nung rangloker aser tang tashi asenok teimbaka nükjidongji, Aotsür Aor lanurtem rongnunga UPSC ajanga IAS,IPS, IFS ama adoktsüla aser state nunga NCS aser NPS ama jenjang aketba mapatemji angutsüla ta asüba nung dang rangloker lir. Kasaji, tsüraburtem nükjidonga item government mapa tulutemji angutsüla ta asüba nükjidong nung tanurtem kaketshidaki yoker. Ano, kasaji asenok lokti tentet ajaki kodaser asen kinunger, asen yimer, asen tzükongpur mesüra asen kin nungia karbosa UPSC aser NPSC ajanga agiba tatidang nung takok angutsü ta asüba nung shisatsü agidang masü saka senotsüa agia yaria nungiter. Tetezü, tang tashibo asenok mangdang aser nükjidong ajak agi government mapa nung asen nisung tulur akümer asü makümer ta asüba nung rangloka lir, anungji tang ama kodang takok mengulir asenok asoshibo aji alima tatem ama bilema tezüdangtep alur. Ajisüaka, asenok nükjidong ya melenshitsü mapang tongja tongogo aser asenok nükjidong ya UPSC aser NPSC ajanga anguba government mapatem dak nung jagi tuluba aser temaba nung yur, government mapa inyakba agi pei lima agi sensaker lima kümdaktsüba lima masü saka peisasa pei lima rongsen bushiteta molutetba mapatem inyaka asen lima agi takar lima kümdaktsüba alima tasen ka asoshi asenok lanurtem meranga azüngtsüla aser asenok tsürabur aser taintem nükjidonga aji asütsüla. Aji oda, asenoki asenoksasa asenok ya Naga nunger rongnungbo Pioneer ta rajemogo. Iba pioneer narokümüji Yisu temeim yimsü tajung agizükba, kaketshisatsü angazükba, NNC aniba, Naga nunger kaketshirtem lungjemdaktsüba, India nunger football team Olympic-i anir aoba, Nagaland state akümba aser Civil Service ngua aika tulur akümba nungi aazükba naroküm asütsü. Atangji, ano asenoki pipokba lenmangtem aika nung Naga nungertem jangratema jajaya alitsü südi. Itemji asenok asoshi memetetba mapa tasen masü, anungji item lenmangtem nungji tangar Naga nungertem anisüngzüka jajadaktsütsüla, kechiyong item lenmangtemji asenoki asen kija jajatsü atema pibokba masü saka tangar jajadaktsütsü asoshi bilema pibokba lenmang aser mapatem lir. Atangji, item mapatem asoshi asenokia maneni merangdangtsüla aser shisalen tajung agüja anitsüla. Pioneer-tem mapaji aji lir. Ajisüaka, asenok rongnung tang ama "Combine Competitive Exam" nung takok junga mangudang mesüra ano tang ama Chief minister mekümtet dang kecha balaka nemjema mebilemli. Tangari ashi ama, tang ya asen mapang masü, kechiyong asenokbo Pioneer. Iba tangatetba nung asenok ya, iba putu nungbo, joko pioneer masü Pioneering kin asütsüla. Tetezü, joko tanü putu den peta Naga nungeri matongba, merajemba aser mekoktetba khuret bener ano putu tasen nung len tasen pipoka Naga nunger alima tasen kati anir aotsü merangtsüla. Ajisüaka, tang tashi asenok tebilemba aser nükjidong ajunga agi, UPSC/NPSC tatidang nung takok angutsüla aser asen yimer-a MLA kabo alitsüla ta asüba tangatetba yagi asenok tejakleni moutet atsü itta ayur amai angur. Atangji, bilemdangdi süra, UPSC aser NPSC nung takok anguba ajanga Nagaland ajungtsü asübo asenoki Nagaland jungdaktsür lila. Iba jagi, Nagaland tajungba ka yanglutsü asoshibo UPSC aser NPSC ajanga mapa tajung ngutetbaji "Solution" masüa ta asenokia jangjateter. Aji süra, asenokbo anosa nükjidong ajunga agi UPSC aser NPSC tatidang akoktsübaaji dang asütsü na? Ibaji kodang asenoki süoki ia bilemdangdir, asenok nem Pioneering shisatsü tasen aika agütsütsü aser asenoki ano khen Naga nunger ajak ochishia jangratema alitsüsa alima tasen ka yateta yutsütettsü. Atangji, 20th Century-ji asenok asoshi Pineering Stage 1 ama liasü aser tang iba 21st Century ya asenok asoshibo Pioneering Stage 2 ama bilema taoba putu nung ayuba nükjidong tejentem melendi.

OLEMSABANG

KOBA LINÜK NUNG YIMJUNG MALI IBA LINÜKJI TEJAKLENI MAOTSÜ

~ L. Kika Pongener

(Yashi adok nungi...)

Koba linük nung yimsüsur aser lennirtemi Tsüngrem akümtsüba, nutsüng-nubur dang meima yimsü sudir....Iba linük nungji nuburtem tetsübo tatenden kecha makai sadok-sadoka alitsü. Iba ama yimjung nung sunepa aliba linük nungjagi alimai aka-ana ta züngshitsüsa nungtuko lennir aser kenshi-oshir aser alimai metetba lennir tajung aika adoktsü. Ajisuaka, koba linük nung yimsüsur aser lennirtemi Tsüngrem amaadoker, nutsüng-nubu aika aliba; tashitemetet; takaba rongsen aser tashi (Power); item dakji nendaker ngasangadema, mezümeküma, tashiyim agi yimsü asür; iba linükji renloka tejakleni maotsü; maparen aika nung takok mangutsü aser maparen kar nungpo maaksua ajurutsü. Koba linük nung yimsüsur aser lennirtemi tanübo ozü mapang....Yimdenji aser lokti-ji onok kapu nung amma lir....ta Tsüngrem aser nubur aküm-metsübu tashiyim agi yimsü asür....Iba linük nungji nuburtem asükdema temulung zürepba tia nung alitsü.

Koba linük nung teti nubur tsüngda tenukmeremtepa, tsükchitepa aser arishitepa lidir.....Iba linükji telungi alutsü, tesuleni talangka oa-adoktsü aser putu aika tangar memenuptsü. Koba linük, koba yimsüng aser koba lokti nung nubur tsüngda telongjem, yimjung aser tesunep makalir....Iba linük, iba yimsüng aser iba telok nungjagi alima raksatsür, alima menentsür, lokti raksatsür, linük aser nubur nem maaksu bentsür arur; nisung tepsetter aser kiralongrar lanur tamajung aika adoktsü. Kechiyung iba linük, iba yimsüng aser iba telok nung; anepdang aonung shia kipok ajak nung; kati ka den tsükchiteptsü; kati ka arishitsü; kati ka atsüngdoktsü; kati ka attsüzüktsü aser telok kati ka telok ka tashiyim agi amokbangtsü....Iba amala tasa asaba, sentong atongba aser ibala otsü, olulu tapu-tapu jembiba agi sunga lidir....Iba linük aser iba yimsüng nung aliba lanur ajak mulungsentsü nung tila tanür asüdang nungi iba tsükchitepba aser arishitepba shisatsü tamajungtemji jangoker aintsü.

Linük ka yimjung nung sunepa aser longjema alitsü atema nutsüng-nubur rongnung kati ka züngshia, kati ka akümtsüba aser kati ka tenzüka aser kati ka den sungpo aputepa alitsüla. Yimsüsuri nubur dang meima aser asü-anguma yimsü asütsüla. Nutsüng nuburi yimsüsu aser lokti lennir dang akümtsübuttsüla. Yimsüsur-a suang, nutsüng-nubur-a suang, shirnoki tanü ajung asa-a, tanü takok asa-a; tashiyim agi amokmerena amokbangtsü meranger....Ashiko, item yimsüsur aser lennir-jibo kanga tansutsü-ka asütsü. Shirnoki linük ka, yimsüng ka aser lokti ka longjema aliba; mepetmesu adoktsüsa, raksatsüsa aser telemsa adoktsüsa sentong atongdir....Ashiko, item yimsüsur aser lennir-jibo Tsüngrem tsüngdang khuret tulu asütsü. Koba linük nung kati ka dak tenukmeremba, tsükchitepba, arishitepba, kati ka attsüzüktsü merangba aser kati ka atsüngdoktsü merangba....Iba ama shisatsü tamajung adenba lennir aika lidir....Iba linük nungji nuburtem kodanga longjema aser sunepa malitsü.

Linük ka yimsüng ka aser lokti ka nung; yimsüsur aser lennir kari tanübo ozü mapang....Onok ket nung tashitemetet lir; takaba rongsen lir aser tashi (Power) amma lir ta ulua bilema lira....Ajibo, kanga-sa mashi-malo tangatetba asütsü. Aji oda, lokti ka nung tashi (Power)-ji nisung kar, telok kar kijai anguba masü; saka senso nubur ajak longjemer anguba ta senso ajaki angatettsüla....Anungji alima raksatsüba nung shilem agir lennir masü; saka alima yanglutsüba nung shilem agir lennir asütsüla aser nubur ajak tsütsü küsasa züngshitsüla. Koba linük koba yimsüng aser koba telok nung lennirtemi nutsüng-nubur aküm-metsübu, ngadangadema, asüküma, mezümeküma, tashiyim agi kati ka amokmerena, arishitepa, tsükchitepa lidir...Iba linükji yimchi-yimjung malitsü, tsük-ensung masütsü, azükaro malitsü, terenlok makatsü aser putu aika tangar memenuptsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Sudan nung arogo lenir ana pua bener aoba chiokogo

Nairobi, Luroi/August 11 (Agencies): Sudan indang Nuba Mountains nungi arogo lenir ana pua bener aoba chiokogo, ta yangji aliba osangtem ajanga ashir.

Rev. Yaqob Ibrahim Tia aser Zakaria Suliman Jana, tenaprong Heiban, South Kordofan state nung aliba Sudanese Church of Christ (SCOC) indang arogo ka nung lenir tejangja liasü aser tena ya July 28 aser August 1 nung chiok, ta yangji aliba Khristanpuri ashi.

Kechi tebilemba nung apu mesüra kechi yimya nung chiok, ajibo mashi saka tena apuba ya Sudan People's Liberation Army-North (SPLA-N) nungi razüka aortem mapa lir ta ashi.

Pastor Tia ya par kinungertem - jabaso ana, ka arishi küm 17 aser ka 20, arishi küm 15 tain kinunger ka aser Daniel Ibrahim Tia, Catholic priest Fadi Ibrahim Tia tenu nunger den külemi chiok. Fadi Ibrahim Tia ya Pastor Yaqob Ibrahim Tia adianu lir.

July 23 nü Pastor Yaqob Ibrahim pua bener aoba sülen July 31 anepdang Pastor Jana ya pua bener ao.

Pastor Yaqob Ibrahim Tia den Heiban nungi külem arogo lenirtemi tepela aser tenüngsang agütsüba metetdaksü aser Heiban nung SPLA-N factions tsüngta rara adoka aliba anema

jembia liasü. Yangji aliba arogo lenirtem dena 'hand-over meeting' ka amenba sülen pa aser par kinunger aser tangartem ya chioka liasü.

"Tang onok aliba tesem nung rara aliba yagi nisung ajakbo majangzüker," ta Rev. Tia-i arogo lenirtem adenshia alidak ashi. Pai yimden yimsüsürtem dang azüdokshi aitsütsü aser yimjung bener arutsü ajungshia liasü. Iba rara adokba nung Sudan sorkar shilem kar lir südi ta amanger.

Parnok pua bener aoba ya iba region nung arogo lenirtem dak tenük yokba tali akumba nung shilem ka amai lir. SPLA-N kübok aliba tesem nung media memelar, saka rara ajanga nisung noklang aika pei ki yutsür tesem balala nung jenshia lir aser parnokji timba tetsür, tanur aser teintet rogotem lir ta osang kar temai adokogo.

July 24 nü SPLA-N nungi razüka aoba militia temi Heiban District kübok Dabi administrative Unit nung Episcopal Pastor Adel Idris Jongool khaseta liasü. SPLA-N, razüka aoba teloktem aser tanga telok tem tsüngta raraba mapang June 19 nü Catholic putir ka aser pa indang guard ka Kauda, South Kordofan nung aliba Holy Cross arogo nung kasa razüka aoba telungpur temi tepseta liasü. Ano guard ka dak injang

khaloktsü, saka tasü nungi jenbua mozü kidang anepaluba mapang lir.

Nuba Mountains nungya SPLA-N tashi ita lir aser Khartoum den mapang talangka nungi rara arur, aser Sudan nung April 2023 nung tenzükbä mitkar rara nung maden, saka SPLA-N sepaitem paramilitary Rapid Support Forces (RSF) den lungjemer Sudanese Armed Forces (SAF) den raraba mechi yangji frontline tasen ka adok.

RSF aser SAF ya Islamist forces lir aser parnoki tanga combatants yarir ta tai tonglokja tesem balala nung prokshia aliba Khristanpur dak amaker.

Sudan nung nütsüng yongsük shilem 93 shi Muslim lir, kong shilem 4.3 shi tanga ethnic traditional religion sülen anidaker aser Khristanpur shilem 2.3 lir, ta Joshua Project ajanga ashir.

Open Doors ajanga alima nung Khristanpur alitsü asoshi linük tamajungtiba 50 asadangba 2026 World Watch List nung Sudan ya jenjang 4 buba nung lir.

Bashir kübok 2019 küm Islamist dictatorship tembangba sülen küm ana Sudan nung tamangba yimsü temeden jenjang tajungba akumba sülen October 25, 2021 nung mitkar temi tashi amshia sorkar atsüngdoker tamanger tem reshikangshia amshiba tali akum.

ANOGO ABEN TSÜNGREM DEN

Taochi agi sünga aliba Tsüngrem

"Saka tang Khrista Yisu nung nenok shir alemli talang nung liasü, nenok Khrista Yisu zü nung anasa kümdakja lir" (Efesa 2: 13)

Kodang Adami tashi mangaba ajanga alimai temenen aru, meimchiri Tsüngrem anasa mouteti Pa den telongjem sama. Aji oda süaka, temenen ajanga Adam Tsüngrem den telongjem samaba putu ajak nungji Tsungremi Adamji repranga aser nüka liasü. Anungji, ano tanaben tesendaktep yanglutsu asoshi Tsungremi tanabuba Adam yoka Pai mapa inyakba Tasen Lai zülurtemi zülü.

Nisungi Tsüngrem nungi pilaa ao aser ammag aser tasüba nung ali. Adam aser Eva atsüki nungi aridok. Tasü tait melena tetsübu aru. Mulungdok aser teimlaji tetsübu tatenden den melentep.

Nisung samaa alibaji Tsüngremi lenmang yanglua Pa anasa anir arutsü jangraa liasü. Anungji meimchir menen alangzüktsü aser timtem ajak aremtsü Tsüngremi Pa ajaso chir iba limai yok. Kodang nisungi Khrista dak tamang ayu, idangji Tsüngremi nisung nem tatok agütsü. Angati Tsüngremer taochi ajanga Pai tamanger ajak yimsüsüba menden anasa arutsü lenmang lapoktsü, kechiaser Tsungremji temeim agi sunga aliba Tebu lir.

Asenoki maneni temenen mena-aka, Pai maneni pa anasa arudaktsünüa atar. Pai nisung kata temenen nung mesamadaktsüner. Tsungremibo meimchir ajak Pa temeim nung pelatepa lidaktsüner, saka nisungi tashi mangaba ajanga Pa nükjidongji matalokerba dang.

Chhattisgarh nung Khristan lenir apuba mechi tamangertem aoksateper



Chhattisgarh state nung Khristanpur anema mapa tamajung inyakba tali akumba anema linük yimtiba, New Delhi nung January 8, 2023 nung tamanger temi longkak aيتدang tangokba noksa ka yangi angur.

Raipur, Luroi/August 11 (Agencies): Chhattisgarh state nung Khristan lenir kati Hindu nunger temulung yirutsütsüsa social media nung o meshidak züluba mechi apuba atema arogo lenirtem aser rights activists temi aitsür.

Arishi küm 75 tain Chhattisgarh Christian Forum indang tir aser state nung sorkar kumteta aliba Bharatiya Janata Party (BJP) anemer Arun Pannalal ya police temi August 7, 2026 nü state yimtiba, Raipur nung par kidang apu.

Pa tasüngji yangji aliba court ka dangi bener aru aser anogo 14 custody nung yua alitsü totuyuba agütsü.

Tamangba yimsü tsütsü temulung yirutsütsü tebilemba nung asaa inyakba, yimjung

raksatsü ajungmesoba aser nüburtem tsüngta tsükchitep adokdaktsüba atema Pannalal ya apu, ta police-i ashir.

BJP odongtar Amit Chimnani-i ken o agütsüba nung Facebook post aser comments indang screenshots aser URLs dener agütsü aser itemji ajanga Hindu nunger mulung yirutsür ta tai tongloktsü.

Hansraj Goyal indang Facebook post ka nung Pannalal-i tai aputsüla zülua Hindu nunger tamangba yimsü aser Hindu nunger süngyanglu tem indang ashi, ta Chimnani-i benokba first information report (FIR) nung shia liasü.

"Tai tonglokja aliba ama kübu-i Hindu nunger süngyanglu mezüngmeshia social media nung kecha

melemsa," ta par jabaso Vaibhav Pannalal-i UCA News dang ashi.

Nisung kari kübu ama pa tenüng aser noksa amshia social media nung tim masüba mapa inyak südi, ta pai temulung meleme bilemba lemsatep.

State nung reshikangshia amshiba Khristanpur atema kübui ola adokba anendaktsütsü, tsübodaktsütsü aser merenshitsü atema jelia sentong yanglua yur pa apu, ta jabaso-i ashi. "Bail atema ozü lawyers temi temaba court [District and Session Court, Raipur] dangi abentsü," ta Vaibhav Pannalal-isa ashi.

State nung Raigarh indang Bishop Paul Toppo-i ashiba agi, BJP-i yimsü asüba state nung anti-conversion law tesashi benokba sülen Khristanpur aser lenirtem dak tenük yoktsü kanga melaa kumogo.

State Assembly ajanga March 19 nü Chhattisgarh Freedom of Religion Bill, 2026 tasenba agizüka state gazette nung August 4 nü adoka sülen mapa kuma amshi tenzüker anogo ishika tsüngta Pannalal ya apur alitsü.

"Sorkari iba amai kera iba ozüng mapa kuma amshi tenzükbä ajanga Khristan minorities dak tenük yoktsü tebilemba aliba sayur," ta Toppo-

i UCA News dang ashi.

Police temi tasü tait Khristan lenirtem samesa nunga merenshir, ta pai ashi.

All India Catholic Union indang odongtar aser osangbener John Dayal-ia Arun Pannalal apuba asoshi tebilemtsü lemsatep aser pa tangsa chioktsüla ta takhangba agütsü.

Pai August 9 nü sangdong ka agütsüba nung linük nung activists tejangja nübu temi meyongnem agüja liasü, aser yangji Chhattisgarh nung reshikangshia amshiba Khristanpur osang meteta alirtemi Pannalal tenüng ya meteta alitsü ta ashi.

Chhattisgarh Chief Minister Vishnu Deo Sai-i yimjak nung Pannalal tai ta shiogo aser court katia iba ken o masadang lia paibo Pannalal inyakyim tim masü ta shiogo, ta Dayal-i ashi.

"Kodang minority activist ka puer ghonda ishika tsüngta state sorkar tekolakbai iba ama obendang o jembidir, tai malir mulungsentsü menentsür aser judicial custody ya tenüng ka amai dang akumer," ta pai ashi.

Chhattisgarh nung kin tila tem indang tamangba yimsü alenbangtsü asoshi anti-conversion law tesashiba kuma yanglushir mapa kuma amshi tenzükbä mapang Pannalal ya

apu, ta Dayal-i ashi.

United Christian Forum tir Michael Williams-ia jungjunga aser tim yimya nung bushisüngdang masü tashi Pannalal ya tangsa chioktsüla, ta ashi.

India nung tanga state 12 den kasa BJP-i yimsü asüba Chhattisgarh state nunga tamangba yimsü melenba anema hadir ama amshiba ozüng amshi tenzükbä sülen talisa Khristanpur kanga shisabolur.

Tebilemtsü tulutibaji, ozüng tasenba yagi nisung kati mulungsoa tamangba yimsü agizükba nunga temulung melemteti reprangtsüsa tensa adokdaktsütsü ya lir, ta Chhattisgarh Progressive Christian Alliance indang convenor Pastor Simon Digbal Tandi-i ashi.

"Ibai constitution nung maliba ka inyakba kisüng masü saka jurila nüchi, tetsür temeden aser tashi, tamangba yimsü tsütsü minorities temi pei mulungba sülen anidaktsü temeden agüja aliba anema tashiyim amshiba lir," ta Citizens for Justice & Peace indang secretary Teesta Setalvad-i ashi.

Chhattisgarh nung nütsüng yongsük million 30 jungnüa aliba nungi Khristanpur shilem ana majung lir.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Züngkümsa

(v) kümükümshia, tashi itshia (revitalise)

*Asenok libaliru nung züngkümsa alitsü kanga nüngdaka kümogo

Zünglok

(v) talila enoksem (added in number)

* Ozü kidong nung par kidonga dena zünglok.

OLONG PAITEP # 7595

1			2			3			4	
			5		6		7			
8										
			9							
	10									
								11		12
			13				14			
15						16				

TIPIEN

- Anenzükdak ki
- Asür mangyimba
- Temulung nung shisadang
- T ____ lu
- Takdang temalen
- Tesa ____ a
- Ajungbena temulungjang
- tongtonglatsü atu
- Tejen lai nung tesayur
- Tsüingsak-mopung

- (5)

- (5)

- (5)

- (3)

- (9)

- (3)

- (5)

- (5)

- (5)

LANGTSÜNGLEN

- Reprangdaksü
- ____ ur
- Kiojen yangludak
- ____ ait
- Nagaland nung ayong ka
- Küm kasa purtem
- Tetsüing tajemtdak
- ____ adenshi
- Tsünüsenbongtsü adokdak

- (4)

- (3)

- (6)

- (7)

- (5)

- (5)

- (6)

- (4)

- (3)

OLONG PAITEP # 7594 TELANGZÜBA**TIPIEN :**

- Aben, 4. Artsü, 7. Lisem,
- Liwa, 9. Sarasadem, 12. Aket,
- Mangu, 15. Anünü, 16. Ango.

LANGTSÜNGLEN :

- Aruli, 3. Balala, 5. Suwar,
- Belem, 9. Süjak, 10. Aonung,
- Dokan, 13. Tinu.

NAI-A YA METETTER

China nunger Yan Yanjia-i langtsünglen shir hula hoop teimtiba sütetba indang otsü tasen ka yangluogo. Yanjia-i langtsünglen shir hula hooping 33 tashi sütetba ajanga "most hula hoops spun whilst suspended upside down" Guinness World Record tasen ka yanglutetogo.

Karbi Anglong nung Greenfield Airport atema survey team arutsü

Guwahati, August 11, 2026
(Agencies): Assam kübok Karbi Anglong nung Greenfield Airport ka yanglutsü asadangtsü atema survey team ka arutsü ta Karbi Anglong Autonomous Council (KAAC) Chief Executive Member (CEM) Tuliram Ronghang-i ashi.

Delhi nung Union Civil Aviation Minister Ram Mohan Naidu Kinjarapu den ajurutepe senden amendang iba tebilemba lemsatop aser memorandum ka agütsüogo ta Tuliram Ronghang-i ashi.

Union Minister-i telangzüba tajung agütsüogo aser iba ajanga

Karbi Anglong aser West Karbi Anglong nung alirtemi mapang talangka aginüa aruba ataloktsü ta pai ashi.

"KAAC-i mezüngbo Borlangpher nung airport atema ali 1,070.95 hectares agütsütsü shimteta liasü, saka funding mechanism, implementation requirements aser long-term viability meyipa reprangshiba sülen Kheroni nung ang yanglutsü lemtet" ta Ronghang-isa ashi.

Kheroni nung airport yangluba ajanga Karbi Anglong aser West Karbi Anglong dang masü saka Dima Hasao, Hojai o

Nagaon amala kidanger district tem ajangzütsü ta pai ashi.

Ministry of Civil Aviation-i taoba nung Kheroni site atema Pre-Feasibility Study ka asütsü shidangogo.

"Civil Aviation Minister Rammohan Naidu Kinjarapu-i iba onük agizükba aser telangzüba tajung agütsüba atema kanga pelar" ta CEM Ronghang-isa ashi.

Karbi Anglong aser West Karbi Anglong nung alirtemi 2021 MoS kübok airport tenangzüka mapa akümtsü teimla tulu lir. KAAC-i maneni iba mapatong ya Centre aser Assam sorkartem den jembitsü ta paisa metetdaksü.

Tripura-i UAE dangi organic honey seret 1,000 bener yok

Agartala, August 11, 2026
(Agencies): Tripura-i tang mezüng atema United Arab Emirates dangi ninang mojitzü seret 1,000 bener yokogo.

Agriculture and Farmers' Welfare Minister Ratan Lal Nath-i Hombarnü International Organic Buyer-Seller Meet lapoktsüdang ninang mojitzü apusoa yokogo.

Iba sentong ya Ministry of Commerce and Industry kübok Agricultural and Processed Food Products Export Development Authority (APEDA) ajanga ayongzüka agir.

Tripura-i organic cultivation nung tejakleni ogo aser tang

aluyimer 47,000 shi kati organic farming südar aser ali 26,000 hectares shi organic cultivation kübok lir ta Minister Ratan Lal Nath-i ashi.

"2018 matongdang state nung ali 2,000 hectares shi ka nung organic cultivation liasü. Tangbo 26,000 hectares nung organic cultivation asür aser aluyimer 47,000 lir" ta pai ashi.

Agriculture and Farmers' Welfare Department aser Horticulture Department teyari agüja farmer producer organisation (FPO) ajanga ninang mojitzü yokogo ta paisa shisem.

"Taoba nung onoki tanga state tem dangi organic honey

yokogo saka bendang linüki meyokdang liasü. Tang mezüng atema FPO ka ajanga onoki UAE dangi organic honey yokogo" ta Minister Nath-isa metetdaksü.

APEDA aser Centre sorkar teyari ajanga Tripura nung genuine and certified organic products adoker. Queen Pineapple, Sabri Banana, scented lemon, jackfruit, turmeric aser ginger kanga junga adoker ta paisa shisem.

Iba buyer-seller meet nung technical sessions agitsü. New Zealand, Australia, Egypt, South Korea, Italy, Argentina, Germany, Greece aser Philippines nungi international buyers-i iba sentong nung adener.

Lumding-Badarpur Hill Section nung Train Services melenshir

Dimapur, August 11, 2026
(Agencies): New Harangajao station anasa railway tracks (Line-1 and Line-2) yanglushiba sülen restoration work maneni inyakba ajanga Northeast Frontier Railway (NFR)-i train kar athiba osang metetdaksüogo.

Lumding-Badarpur Hill Section nung Line-3 ajanga dang train senzür aser iba ajanga tsünglanglen agüja aliba train services melenshir.

Cancellation of Trains:

* Train No. 15617 (Guwahati - Dullabcherra) Express - 12.08.2026 nü apusotsü aliba train Guwahati aser Dullabcherra tsüngda athir.

* Train No. 15618 (Dullabcherra - Guwahati) Express - 13.08.2026 nü apusotsü aliba

Dullabcherra aser Guwahati tsüngda athir.

* Train No. 15615 (Guwahati - Silchar) Express - 12.08.2026 nü apusotsü aliba Guwahati aser Silchar tsüngda athir.

* Train No. 15616 (Silchar - Guwahati) Express - 13.08.2026 nü apusotsü aliba Silchar aser Guwahati tsüngda athir.

Rescheduling of Trains:

* Train No. 15650 (Narangi - Agartala) Express - 12.08.2026 nü apuotsü aliba Narangi nungi 22:30 hrs nung apusotsü melenshir.

* Train No. 15649 (Agartala - Narangi) Express - 12.08.2026 nü apusotsü aliba Agartala nungi 23:30 hrs nung apusotsü melenshir.

* Train No. 15609 (Guwahati - Sairang) Express - 12.08.2026 nü apuotsü aliba Guwahati nungi

23:30 hrs nungi apusotsü.

* Train No. 15610 (Sairang - Guwahati) Express - 12.08.2026 nü apusotsü aliba Sairang nungi 21:30 hrs nung apusotsü.

* Train No. 15611 (Rangia - Silchar) Express - 12.08.2026 nü apusotsü aliba Rangia nungi 23:30 hrs nung apusotsü.

* Train No. 15612 (Silchar - Rangia) Express - 12.08.2026 nü apusotsü aliba 13.08.2026 nü Silchar nungi 05:00 hrs nung apusotsü.

* Train No. 15646 (Silchar - Charlapalli) Express - 12.08.2026 nü apusotsü aliba Silchar nuni 13.08.2026 nü 04:10 hrs nung apusotsü.

Regulation of Train:

* Train No. 17031 (Charlapalli - Agartala) Express - 10.08.2026 nü mapang tapet nung apusotsü.

GOVERNOR'S SECRETARIAT**NAGALAND :: KOHIMA**

No. G-06/4/AP/00 (Vol-I)::

Dated Kohima, the 11th August, 2026.

ADVERTISEMENT

Applications are invited from eligible candidates for filling up the following vacant posts under Lok Bhavan Establishment, Kohima, Nagaland in the attached prescribed format. Application form can be downloaded from www.lokbhavan.nagaland.gov.in and www.nagaland.gov.in. The application form may be submitted by hand/post to Governor's Secretariat, Lok Bhavan, Kohima, Nagaland or email at secy.lokbhavankohima@gmail.com on or before 27th of August, 2026.

Item No. 1: 1(one) post of MTS in the Pay Matrix Level-1A under the Governor's Secretariat, Lok Bhavan, Kohima.

Item No. 2 : 1(one) post of Bearer in the Pay Matrix Level-2A under the Household Establishment of Lok Bhavan, Kohima.

Item No.3 : 1(One) post of Masalchi in the Pay Matrix Level-1A under the Household Establishment of Lok Bhavan, Kohima.

(THAVASEELAN K) IAS

Commissioner & Secretary to Governor.

Sudan nung army-i nisung 25 rema aliba leper ka kaktetogo



Khartoum, Luroi/August 11 (Agencies): Suran armed force-i southeastern Blue Nile State nung nisung aika rema aliba leper ka nung tasumang 25 ngutetogo. Item nisungtem tepsetba ya ketdangsürtemi paramilitary Rapid Support Forces (RSF) dak tai tongloksüogo.

Iba leper ya Kurmuk jila nung nguteta liasü. Hopta aika rarateper Sudan army-i iba tesem aziokba sülen ita ka lir iba leper ya kakteta liasü.

Kurmuk commissioner, Abdel Aty Mohamed al-Faki-i iba leper kaktetba osang ya Deobarnü metetdaksü, ta The Sudan Tribune sangdong ka ajanga metetdaksü. Sudan army-i jila northeastern len meita aoba sentong ka benoka inyakba mapang leper ya

nguteta liasü, ta kasa sangdong ajanga metetdaksü.

Leper nung tanur, tetsür aser mozüki nung inyakertem tasumang densema liasü.

Al-Faki-i ashiba agi, asürtem ya Jebel Fankat anasa tepset. Tenem nung aliba tesem ya RSF puri iba tesem temeket amakdang drone yoktsü atema amshia liasü.

Ken o dak sendakba nung RSF puri kecha telangzüba magütsü.

RSF pur shirnok 2023 küm April ita nungi Sudan army den raratepa arudar, parnok ya linük yimtiba Khartoum, el-Fasher yimti aser central Gezeira state nung tai maketba nisung aika tepsetba atema aija arudar.

Al Jazeera osangbener Almgidad al-Ruhaid-i Khartoum nungi ashiba agi,

Kurmuk nung iba leper ngutetba ya kanga tongtibang aser minprongtsüka lir.

"Local ketdangsürtemi Kurmuk jila atsüngba mapang item nisungtem tepsetba atema Rapid Support Forces aitsüogo," ta pai ashiba den, RSF puri Blue Nile State maneni maka aliba mapang ka nung iba leper ya ngutetogo, ta shisem.

Maneni RSF pur kanga tashi ita amenoker aliba West Darfur nunga telok ana tsüngda maneni raradar. Paramilitary force-i Bir Saliba amakba Sudan army-i nokdanga arudar. Iba tesem ya el-Geneina yimti nungi km 40 shi pilar lir.

Iba rara nung nisung 40,000 shi süogo aser nisung million 14 dak tema pei talidak ki toktsür jenshiogo, ta World Health Organization-i metetdaksüogo.

Thai PM-i prangbong alitsü atema permit magütsütsü tuyu



Bangkok, Luroi/August 11 (Agency): Thailand Ato Kilonser Anutin Charnvirakul-i Mongolbarnü prangbong alitsü atema permit agüja aliba anendaksüogo aser tang aliba licence tem asadanghitsü ta shiogo.

Aogo ishika tejakdang arishi küm 14 tain asangur chanu kati nisung teku tepsetba sülen PM-i tang iba tenokdangba ya agütsüogo.

Anutin Charnvirakul-i legal affairs ketdang asüba deputy

prime minister ka dang prangbong azüoktsü atema ozüng tasenba takaraba nung yanglua benoktsü aser aibelenertem nem temerenshi tesashiba agütsütsü atema jenjang agitsü tetuyuba agütsüogo.

Police tem dang prangbong alitsü asoshi temelaba agütsüba permit tem meyanglushitsütsü atema tuyuogo.

Kasa mapang nung tang benoka aliba temzüng ozüng dak ajemdaker züngoksema

aliba prangbongtem kidang dang ayutsü aser yimdong nung bener mesenzütettsü, ta Anutin-isa metetdaksü.

Ozüng alema alizüka aliba prangbongtem dak sendakba nung, mapang tatakzük ka nung state nem item prangbongtem meyipa agütsüdaksütsü atema ozüng ka benoktsü asoshi tang bushisüngdang südar, ta pai ashi.

Taoba hopta asangru chanu kati Bangkok tezülen school ka nung nisung trok tepset aser iba sülen pasasa khaseta liasü. Pai pa tebou tepsetba sülen school yagi arua item nisungtem khaseta liasü. Iba tatalokba ya Thailand nung küm pezü tsüngda iba amala mesükba lendong tamajungtiba liasü.

Thailand nung civilian tem ket nung prangbong million 103 lir, aser iba tetezü kibong 100 nung 15 ket nung prangbong lir.

Maneni education minister-i school tem kümzüka toktsütsü atema inyakyim tasen ka cabinet nung benokogo, kong rijutemi aiba mapang ozüng alema amshiba hadir aser prangbongtem bena ali mali aji asadangtsüba densema lir.

Mulungnen O

Ozü temeimtiba jabaso **Sp.Nokinyanger Ozüküm.** Mongsenyimti 7th August 2026 anogo Khar lushi nung ajungben gari lendong nung taküm samar lia Khar yimdeni anir lokti telen balala aser nija shirnokisa pei tashi dak alia temeim mapa tongpu apua yaritepa mang anepalua renema ozü kilem tashi tongtsüogo, nenok ajak dang ozü molung nung mesümi pelaba lemsateper. Arem meta nungi mang agi pei tasoli tongja temeim sayua teyari balala agi onok khu p u n g p a d a k j a anisüngzükdaksüba den yimer yimsanger ana aser talang nungi iba den pur bendang balala nungi tembartemi ozü asüko nung yaritepa ozü molung sünepdaksüogo nenok ajak dang kangasa pelaba lemsateper. Ajak dak alaka item lokti aser nija dang süoki yia pelaba shisemer.



1. Mongsenyimti Baptist Arogo.
2. Mongsenyimti Baptist Arogo Women Ministry.
3. Mongsenyimti Baptist Arogo Youth Ministry.
4. Mongsenyimti Compound Baptist Arogo.
5. Rionsanger Putu Menden, Mongsenyimti.
6. Tenapang Zünga, Mongsenyimti.
7. Longküpok Mepu Telongjem.
8. Loyangpong Football Club.
9. NPF Party Mongsenyimti Unit.
10. Khar Village Council.
11. Khar Watsü telen.
12. Khar Baptist Arogo.
13. Khar Baptist Arogo Women Ministry.
14. Khar Baptist Arogo Youth Ministry.
15. Medemsanger Putu Menden Mopungchuket.
16. Mopungchuket Baptist Arogo.
17. Shri. Tongpang Ozüküm, Hon'ble MLA & Advisor Water Resource.
18. 24th Angetyongpang A/C. NPF party.
19. Police Station Kobulong.
20. EIMER Enterprise.
21. Lakhuni Village Council.
22. Lakhuni PMGSY Committee.
23. Lizo Model Village Council.
24. Alongtaki Village Council.

Nenok temeim mapa Kotaker Tebu Tsüngremi reprangoka kija lokti ajak maneni moajang ta ozü tamang sarasadem den ajak dang pelaba iba osang kakat ajanga lemsateper.

Mr & Mrs. Nüngsanglemba Ozüküm
Aser kinüngertem
Mongsenyimti Village

Office of the Meyilong Students' Union KONANG TETUSHI AGÜTSÜR

Wb. Toshilemba aser Wt.Takolemla na jabaso **Dr.Imliyangba,** Doctor of Philosophy (Ph.D) in Statistics Department, topic; "Studies on Family of Circular Generalized Lindley Distribution with Applications" nung takok nguteta asen Meyilong Students' Union nem konang bener arutsüba asoshi tenüngsang aser tetushi tulu agütsür.

Asen Teyanglur Tsüngremi ne taküm aser wadang ajak nung maneni moajangma ta sarasademtsür.

**Sd/-
Limaakum
President**



**Sd/-
Tiarenla
Secretary**

Jamir Kidong Mokokchung Village Mokokchung, Nagaland TENÜNGSANG ASER TETUSHI AGÜTSÜR

Wb. N. Bendang Jamir aser Wt. A. Chubala Lkr na jabaso **Sb. Moakumzuk Jamir,** shibai Nagaland Public Service Commission (NPSC) ajanga agiba NCS 2025 final result Dt. 10th August, 2026 anogo adokba nung Block Development Officer (BDO) (Class -1 Gazetted) under Rural Development Department nung takok tulu ngutetogo, pa nem Jamir Kidong Mokokchung Village ajanga kangasa pelaba den tenüngsang aser tetushi tulu agütsür.

Teyanglur Tsüngremi ne taküm nübur tenzüka wadang nung takok aser temoatsüba taküm yujangma ta sarasademtsür.

Jamir Kidong Mokokchung Village tenüng nung:
Sd/- R. Kilen Jamir (Tatar)
Sd/- Akangsowa Jamir
Sd/- Longritemjen Jamir
Sd/- L.Tiatemtsu Jamir



6buba Inter-Dept badminton asayamung Kohima nung asayatsü



Dimapur, Luroi/August 11 (TYO): Inter-Department Badminton Club Kohima (IDBCK), aser District Administration, Kohima, na longjemer September 11 aser 12 nü Inter-Department Badminton Tournament 2026 ayongzüka asayatsü. Iba asayamung ya NLA Stadium, Kohima nung asayatsü.

August 11 nü DC Office Kohima nung osangbenertem den sensaksemba mapang IDBCK tir Er. Sabou Yashü-i ashiba agi, club-i 2020 küm nungi iba asayamung ya kümshia takok ngua ayongzüka asaya arudar, aser iba asayamung ya badminton asayatsü jangrartem aser sorkar tenzükertem atema sabang tajung ka kümogo.

Paisa, asayamung nung tebur tarep asaya, tetsür tarep asaya, tarep temeyoktep asaya aser 50+, Legislators, Ex-Legislators aser Retirees' tarep asaya asayatsü, ta metetdaksü.

Yashü-i, department aser riju balala nungi badminton asayatsü jangrartem iba asayamung shilem agitsü

pelashishia jaokogo.

Maneni pai taküm iba asayamung ayongzüksü atema parnok nem teyari agütsüba atema District Administration, Kohima dang kanga pelaba lemsatep, aser ashiba agi, iba ajanga asayamung nung shilem agirtem tali ajungmesotsü aser sorkar tenzükertem yongsü nung sportsmanship tanüla akangshidaksütsü.

Kasa mapang nung Deputy Commissioner, Kohima, B. Henok Buchem, NCS-i, sorkar tenzükertem shilem agidaksütsü aser telongjem akangshidaksütsü nükjidong nung parnoki iba asayamung longjemer ayongzüksü atema mulunga agizükogo, ta ashi.

Pai ashiba agi, iba asayamung ajanga department balala nungi officer aser staff tem longjemdaksür, aser parnok physical fitness, teamwork ajungkettsü aser tokteptsü asoshi maongka tajung agütsür.

Paisa, department balala nung inyakertem dang iba asayamung nung jangrabangra shilem agitsü ayongzüko.

IDBCK General Secretary Kekhreiseto Ziephrü-i ashiba agi, taruba asayamung ya iba asayamung trokbuba asütsü ta ashi. Iba asayamung ayongzükbba nükjidong lemsatepba mapang Ziephrü-i, sorkar tenzükertem pei mapa dak dang timba rangloker alir asünung iba asayamung ajanga parnok sadoktsü atema maongka tajung ka agütsütsü, longjemdaksütsü aser sportsmanship tanüla ajungkettsütsü ta ashi.

Ziephrü-i, asayamung nung takok angurtem nem ajak senteper sen lakh 1 agütsütsü ta shia, sorkar department balala, riju, bank aser tanga lokti tentet balala nungi asayartem dang iba asayamung nung shilem agitsü ayongzüko.

Asayamung nung shilem agitsü atema team shia sen 3,000 asütsü aser form benoktsü atema tatembangbuba anogoji September 7 nü asütsü. Tejangrartemi iba number +91 7085190662 mesüra email idbckkohima@gmail.com ajanga tongteprateptetsü.

Duan Jansen South Africa team nung züngokogo

Luroi/August 11, 2026 (Agencies): South Africa nunger all-rounder Marco Jansen indang jakrep Duan Jansen tang mezügbuba senior team nungi asayatsü atema shimogo. Pa Namibia den taruba white-ball asayamung nung South Africa tenüng nungi asayatsü.

Squad nung asayar 15 ya spinner Bjorn Fortuin lenisüba nung asayatsü. Parnok Namibia aser Zimbabwe na den T20I asayamung ka asayatsü aser iba sülen Namibia den ODI asem asayatsü lir.

T20I tri-series ya Windhoek nung August 28 nungi September 6 nü tashi asayatsü aser iba sülen namibia den September 9 nungi 13 tashi asayatsü. Iba ODI asayamung ya kidanger linük ana tsüngda tang mezügbuba bilateral 50-over asayamung ka asütsü.

2025/26 domestic season nung kanga junga asayaba sülen Duan shimogo. Pai Titans puri title abenba nung tongtibang shilem agiba sülen

pa nem Division 1 One Day Cup Player of the Year naroküm agütsü. Final nung Lions den asayaba mapang pai out mesüi run 61 yanglua liasü.

Squad nung Eathan Bosch ya T20I nung tang linük team nungi mezügbuba asayatsü lir aser kasa mapang nung Connor Esterhuizen, Jordan Hermann aser Nqobani Mokoena nungera ODI asayamung atema tang mezügbuba shimogo.

"Onoki asayamung anaprongla atema squad ka dang shimogo, kechiyong iba squad nung department ajak nungi asayartem lir ta bilemer aser iba ajanga asayartem international jenjang nung asayatsü atema maongka agütsür. Taküm küm tetenzüklen New Zealand den asayaba mapang onoki Connor aser Nqobani nati T20I asayamung koda teyari agütsütetsü aji nguogo. Tia maka Jordan iba asayamung mezügbuba asaya nung yiru, anungji pa nem tanaben maongka agütsüba ya pai koda agir aji reprangdangtsü atema

onok yongya atar," ta ketdangsürtemi ashi.

Coach Shukri Conrad-i ashiba agi, format anaprongla atema kasa squad amshiba ajanga asayartem maneni asayatsü aser international jenjang nung asayatsü asoshi maongka agütsütsü. Nationally contracted asayar Dewald Brevis, Tony de Zorzi aser Kwena Maphaka nungeria team nem teyari agütsütsü.

"Iba asayamung ajanga domestic asaya nung junga asayaba asayartem nem kishi lapoktsüogo, aser Duan-a iba amala asayar ka lir. Pa all-rounder tajung ka aser aji pai Titans nungi asayaba mapang sayuogo. Bjorn ya tjangshiba aika bena aliba asaya aser lenir ka lir. Kidanger den asayatsü ya jangrademtsüka aser South Africa aser Namibia na tsüngda tang mezügbuba ODI asayatsü lir anungji iba asayamung ka kanga tongtibang lir," ta paisa shisem.

South Africa team August 25 nü Johannesburg nungi Windhoek-i aotsü.

Forest-i Sporting nungi defender Diomande alizükogo

Luroi/August 11, 2026 (Agencies): Nottingham Forest-i Ivory Coast nunger defender Ousmane Diomande, Portuguese club Sporting nungi pound million 34 agi alizükogo.

Arishi küm 22 tain asayar yagi Forest den küm pezü atema tenangzüktepba yangluogo aser ano küm ka atsülangtsü asoshi lenmang sadema lapoka yuogo. "Ni iba club nung adenba atema kanga pelar. Iba ya nüngtugu club ka aser iba ajanga ni club nung adentsü asoshi ajungmesogo," ta Diomande-i ashi.

"Onoki taruba season takok aika ngutetsü ta ni amanger, aser asayar aser coach den ajuruteptsü yongyaseta atar. Ni takokba tashi tajungtiba asayatsü," ta paisa shisem.

Forest manager tasenba Oliver Glasner-i 3-5-2 formation asayaner anungji Diomande ya Nikola Milenkovic aser Murillo na den tesülen asayatsü imlar.

Pa Ivory Coast tenüng nungi 15 ben asayar lir aser 2026 World Cup nunga linük indang squad nung züngoksema liasü. Pa group-stage nung Curacao den asayaba mapang asayaogo.

Diomande ya par linük nung Olympic Sport Abobo nungi

asaya-a career tenzük aser 2023 küm January ita Sporting nung maden tsüngda Danish club FC Midtjylland nungi asaya liasü.

Central defender ya iba Lisbon club nungi 132 ben asayaogo aser Sporting puri 2023-24 aser 2024-25 season nung Portuguese league titles abenba nung teyari tulu agüja liasü.

Pa ya taoba season Champions League quarter-finals tonga asayaba team nung densema liasü, saka parnok Arsenal-i tsükdaksü.


Glasner, shibai taküm lemluwa Forest manager mapa agizükogo, pai mapang talangka nungi Diomande aginüa aruogo aser pa Crystal Palace nung inyakba mapanga Diomande alizüktsü meranga liasü.

"Pa ya tjangshiba aika bener aliba defender ka lir," ta Forest indang chief football officer George Syrianos-i ashi.

"Ousmane ya kanga dang tashi tait aser asaya amokbanga asayaba defender ka lir," ta paisa shisem.

Forest puri July ita Austria nunger midfielder Xaver Schlager alizükba sülen tang Diomande den tenangzüktepba yangluogo.

Barcelona captain Araujo loan nung Liverpool nung denogo



nung adentsü lir.

"Ni asaya tenzüktsü matateter. Ni kanga pelar," ta arishi küm 27 tain asayar yagi ashi. "Ni idaki aruba atema kanga pelar aser teammate tem den ajurutepe asaya tenzüktsü matateter," ta paisa shisem.

Centre-back nung asayasang yagi right-back nunga asayateter. Araujo indang professional career ya Uruguay nung Rentistas nungi asaya-a tenzük.

Uruguay club Boston River nungi season ka asayaba sülen pa Barcelona nung oa aden aser club indang B team nungi asaya liasü.

Araujo senior level nung Barca nungi mezügbuba 2019 küm asaya aser 2020-21 season nungibo asaya ajak nung asaya aruogo.

Tang tashi nung pai Barcelona nungi 213 ben asayar lir aser iba mapang goal 14 idaktsüogo. Iba club nung asayaba mapang pai Copa del Rey ana, Spanish Super Cup asem aser La Liga asem kokogo.

Maneni pa international jenjang nung Uruguay tenüng nungia 27 ben asayar lir.

Luroi/August 11, 2026 (Agencies): Premier League club Liverpool FC-i, FC Barcelona captain Ronald Araujo season ka atema loan nung arua club nungi asayatsü tenangzüktepba agiba sangdongogo.

Ronald Araujo shiba central defender ka lir, pa 2026-27 season Liverpool nungi asayatsü aser pa jersey No. 33 asemtsü.

"Liverpool-i defender Ronald Araujo 2026-27 season atema FC Barcelona nungi loan nung anir arutsü mulunga agizükogo, saka pa work permit aser international clearance angutsü nüngdaker," ta LFC sangdong ka ajanga metetdaksü.

Uruguay nunger international asayar ya Barca nungi asaya 200 dak tema nung asayaba sülen tang Liverpool

BILEMDANGANG

"Asüng atema terenemshiba tajungtibaji tanü tajungtiba inyakba ya lir."